

Fasnacht 2019

Blagèèr!



e VSG Bangg

Z Basel gitts Trottoirs die funggle wie gschläggt
Ich ha mi gfrogt, wär isch es wo **so gründlig** fäggt
Ischs d Stadtreinigung mit're neue Methode
Nei! Es sinn die lange Burka's die bis an Boode

Sie hän sich wirkligg scheen bewegt
Sie hän sich gspuutet und sich gschtrengt
Mit Härzbluet, Flueche, Hässele, Toobe
Trotzdäm Gruppeletschte – ich lieb die Schwoobe

Klaider und Schue wo kain me mag
lande fyr Bedürftigi im Texaidsagg
S gitt Unbruchbars das kasch vom Schiff uus see
Zum Bischpil die Halbschüe vo der BVB

Graubünde suecht in Basel Tourischte
Zum fülle vo leere Hotel und Pischte
Und dass d'Tourischte nit z'fescht verschregge
Mien si d'Martullo Blocher guet verschtegge

Bi dr Chiquita Handels Compagnie
Goht letschti e grossi Bstellig ii
Für ihri Vetterliwirtschaft he nunde Fahne
Brucht d'Republik Baselland no mee Banane

Als Annerkennig fyrs Wyyblig-Gschlächt
Keert e Frau in e Zunft, doch s'Signal isch schlächt
Ich als Maa mues mi immer mehr verbiege
Und bald durch mi «Schlüüchli» Kinder kriege

Wer Grippe hett dä blibt im Bett
Wer dr Schiiser e hett goht uffs Klosett
und wer nit in dr Biire hett
der fahrt Elektro Trottinett

E Biebli rennt dervo s'isch Nochburchs Andi
Es flüchtet vor-ere Schleegerbandi
E Pater frogt ihn waisch nit wo aane
Bi mir bisch sicher under d'Soutane

D Basler Polizei wogt sich technisch füüre
Si kaufe Tesla die mit de Flügeltüüre
In änge Gasse du glaubsch es kuum
klättere Tschugger uus em Kofferruum

Ich bi verschrogge und schokiirt
Die ganzi Schwiiz isch düpiert
Die neu Bundesrötin, dr walliser Knoche
Heisst Amhänd und ich glaub die ka gar nit koche

Wottsch au by uns bänggle?
Uff www.vsg-basel.ch erfahrsch meh!



Fasnacht 2019



Kaffidante

Ich sitz im Kaffi bi am Zmorge – in dr Hand e feins Baquette
E Typ sitzt dört – vo Hinde dank i – dä schint no sehr adrett
Mii Häärz das glopft – und glopft und glopft – bis är sich zu mir drääit
079... hätt i solle saage - 0815... haan i gsaaht

Drämmlifaarer sind alli froh – au dr Schälledramper Hampe
Sit dr Äifach-Haltstell – mues äär nümm – uff sini Schälle drampe
Wotsch jetzt neu – in's Drämmli go – muesch uff dä Grieni Balgge stoo
Das wär jo alles schön und guet – wurd emol e Drämmli koo

Dr Schugger Hans isch gigerig – uff's Schuggermüüsli Heidi
Au s'Heidi fummet gäärn am Hans – das liebe si halt, beidi
Denn risse si sich – Gläider wääg – düen enander richtig nee
Und das alles kasch jetzt Live – uss em Schugger-Tesla gsee

I stress in d'Stadt, due vo aim – Lade in andere lauffe
I muess für my Göttibueb – e Legobausatz kauffe
Do Kauft ain aber – alli wägg – i könnti däm grad eins haue
Jetzt isch das doch dä Donald Trump – är bruucht die – zum sini Muure baue

Ich weiss nit was ich sage soll – ich ha mieh mit dene Dame
Gut-Berahmi, Lütenegger-Oberholzer – deene lange Doppelname
Schneider-Schneiter – Käller-Suter – ich grieg jetzt denn e Kriise
Jetzt wart ich denn nur no uf – minu-Silberriise

D'Bundesröötin Doris Leuthard – jä jetzt isch's sowit
Si bolitisiert nümm in Bärn – het füür unser Kaffikränzli Zit
Miir schwätze übers – koche, strigge und üüber – Männer au ganz gäärn
Wie me Kueche bacht – han i ihre zeigt – jetzt wott si ganz schnäll zrugg uff Bärn

Mir zwäi sind voll kriibeligg – und völlig uss em Hüüsli
Dr Hansi Hinterseer chunnt uff Baasel – jo, das Schlagersänger Müüsli
E Diäät muess ahne – Pizza, Schoggi, Faasnachtskiechli – alles andere kasch vergässe
Für e flache Buuch muess me nur – äifach flachi Sache ässe

D Kaffidante darf jetzt Gschalte faare – glernt hett si's Automat-isch
Das mit de Gäng das schnallt si nid – sisch wirgglig problematisch
Si lüttet aa – «I kumm nid vorwärts» – do mein i nur ganz drogge
Bi ich im Auti nid derbi – muesch du uff die linggi Site hogge

Wottsch au by uns bänggle?
Uff www.vsg-basel.ch erfahrsch meh!

Drugg: Amerbach'sche Druckerei, MuttENZ



Fasnacht 2019

D'Schnaps bagge

Wo d'Elisabeth Ackermä am Säggsiilyyte dä Böög sell abfaggle
Tien ihri Händ bim aazynde ganz gewaltig gwaggle.
Also ych wär do ganz ander'sch draa, ych lieb so Sache,
es isch doch so geil, emene Zircher e Fyyr under em Arsch mache.

Fraue wän au in Zünft und Ehregellschafte, so heersch se klööne,
D'Glaibasler mien sich an d'Vogelin Gryff und an d'Leu-in gwehne.
Wenn d'Wild Frau vor dr Zunftmaischtere ummestampft, dänggi fir mi elai:
«Oh, jegerli, oh jegerli, das kenn ych scho vo dehai!»

Ych mäld dr Frau uff Facebook, dass ych si lieb und due se uff Instagram lobe.
Ych twittere, si sig die Grösch und lad se yy per WhatsApp, morn zoobe.
Ych tuenere scheen mit E-Mail, schryyb SMS, vo Sorge, wo ych nimm ka trage,
bis ych mergg: Sie hoggt jo nääbedraa, ych hätt's ere dirägg kenne sage.

Ych ha jetzt au so e Drohne mit Kamera, die loss ych amme lo kreise.
Jo, s'isch fir mi eso aifacher, wenn ych will glyschtele und gnaisse.
Ych ha si in Garte lo fliege, vo dr Schwiegeramsle, dr Gwunder hett mi paggt.
Deert hett sälli gsünnelet «oben ohne» – und die Drohne hett's verjagt.

Jetzt verschwinde d'Telefonkabine am Barfi, friehner hämmer is deert droffe
und sind denne in Ussgang und bis am Morge frieh haiss g'loffe.
Wenn hytt ime Junge dä Träffunggt nenn'sch, seh'sch e verständnislosi Miene
und denn frogt är: «Ey Alte, was isch e Telefonkabine?»

S'git s'Grücht bim FCB, dass dr Valentin Stocker vegan däg lääbe,
drum sig's fir ihn an jedem Match, e wichtigs Besträäbe:
Bevor är e Freystoss schiesst, wirft är sich in Drägg
und frisst rund um e Ball umme s'Gras ewägg.

Mi grieni Nichte im Grossroot, hett s'Buschi mitgnoh, losst's jetzt blyybe.
Anere Sitzig sig ebbis dumm's passiert, si well's nit wyterdryybe.
Bi dr Abstimmig yber e SVP-Aadrag, häb sich das Glaine verschluggt,
und bim Hueschte mitem Händli voll uff e «Jo»-Knopf druggt.

Ych lies am Morge E-Paper, lueg uff d'E-Watch und fahr per E-Bike to the job
check deert E-Mail, gib E-Voting fir E-Learning, it's really top.
Wieder zrug mach ych E-Banking, rauch e E-Zigi, aber s'isch e Katastrophe
nääbedraa wohnt e Y-B-Fan, dä I-diot spielt E-Gitarre, ych ha nit kenne
yy-schloofe.

Ych bi letschti bi dr Raiffyyse an Schalter, will's mi tuet plooge,
«Öb mi Gäld sicher sig» bin ych so e dynamische mit Grawatte go frooge,
«Aber sicher, doch!» hett är g'schlyymt, «unsere Kaderlyt ka me vertraue»
Do han ych kurz noodänggt – und ihm denn e baar uff d'Schnuure ghaue.

Är zieht d'Uniform ab, segglet blutt umme und hyylt wie e Kind
denn versüüberet är sich und verdailt d'Exkremänt am ganze Grind.
Är verschieisst dr Psychiater, lallt wie e Buschi, lauft uff alle Viere,
eso wurd s'Stadttheater, anstell vo de Rassers, dr ney Läppli inszeniere.

Wottsch au by uns bänggle?
Uff www.vsg-basel.ch erfahrsch meh!

Drugg: Amerbach'sche Druckerei, MuttENZ



Fasnacht 2019



dr Hampe vo Kleihünige

Im Fall...

...ich bi dr Hampe vo Kleihünige, ich ha e Schissfrisur
E grauehafti Jagge und tramp umme, wiene Buur
Lueg dri, wie nit ganz abholt und schwätze dueni dräggslet
Me het mi au scho mit dr Frau Aggermaa verwäggslet

...bir BVB ersetze si und fligge überall
Am Bode unde d Weiche und au s Schiinematerial
Mi dunggt, am Bode nutzt si nüt, die Weiche-Zuebereitig
Ersetze sott me zerscht die Weiche in der Oberleitig

...mi Diesel isch e Grüsel gsi, doch meischtens het mr droht
Dass ich am andre Dag nümme gwüsst ha, wo mi Auti schtoht
Dum hani jetz e Tesla, do isch d Suechi nümme dramatisch
Bim Tesla laufscht em Kabel noo, no findschen automatisch

...dä Smog macht mit nit krangg, au d Grippewälle im April nit
Kei Stress, kei Gift, kei Uspuff, au zäh Klöpfer uff em Grill nit
Wemmi öppis krangg macht und mi schtändig losst erblasse
Isch es jede Monet d Rächnig vo dr Kranggekassee

...e Moslem und e fromme Jud, e Hindu und zwei Chrischte
E Atheischt und nomol ein und denn no zwei Buddischte
Die hogge zämme, lache mitenand am gliiche Tisch
Das goht ihm Fall, hejo, wenn kein drvo e Arschloch isch

...wenn d Fetz jetz goht, bruucht Basel bald e neue Schtänderoot
Die Rote hän d Frau Herzog, und kei Beat Jans im Boot
Hei, Beat, wötsch no Wahle gwünne, mach als gleini Handlig
Dr SP z lieb no vor dr nöggste Wahl e Gschlächtsumwandlig

...ob Burckhardt odr Auderset, ob Gröflin ob Aditschi
Schnuurt ein im Groosse Root, denn sotts ab sofort Baseldytsch sii
Weil unser Baseldeutsch die schönschte aller Sprachen ischt
Doch schnuure dien si au uff baseldytsch genau dr gliichi Misch

... uns goht dr Somm verlore und mit ihm e rächti Baz
Und mit dr Baz und dr Novartis mänge Arbetsplatz
Au Tageswuche, Barfi.ch und Barfi-Delifonkabine, s Kaffi Schpiilmaa,
d Basler Hauptposcht und Theaterfalle, Unifächer, freii Parggplätz,
Alts Warteck und Art in Basel, Muba, Hajek, Meischterkübel
und die schöne Hafe-Beize komme mir in Sinn
Eso gseh isch dr Verluscht vom Markus Somm dr einzig Gwünn

...dr erschti Mensch, dr Adam, jo, dä hätt als erschte Maa
Für dass es paradisisch blibt, no gärn e Kumpel gha
Doch dr Lieb Gott het druffab em Adam schüüch verrote
Sorry, ha dr s Evi gmacht, wäg dr Fraequote

...dr Papscht diggiert d Frauewält: Abort isch Ufftragsmord
Was losst denn dä für Schissdrägg uuse, ghörsch vo Süd und Nord
«Schissdrägg», nei, das seit me nit. Das lehrsch scho in dr Schuel
Losst dr heilig Babbe öppis uuse, ischs dr heilig Schtuehl

...e Buschi schloft im Grosse Root, e riise Kataschtrophe
Und d Mamme, die wird uusegheit, so eini muesch beschtrofe
E Riisegschrei, Tumult im Saal, mir wänn do keini Goofe!
Wo s Buschi widr drin isch, könne alli wilterschlofe

...das Radiosänder-Hochhuus dört bim Bahnhof SBB
Das gliicht em Doggder Franggeschtei noch ere Ghirn-OP
Und doch ischs no sympatisch, guet verdaulich, farbefroh
Vergliche mit däm Schissprogramm vom Schwizer Radio

...ich ~~XXXX~~ uff ~~XXXX~~ uff jede Fall e ~~XXXX~~ ver-~~XXXX~~ am Bode
Dä ~~XXXX~~ ~~XXXX~~ und au ~~XXXX~~ und zwor e ~~XXXX~~ und ~~XXXX~~-Methode
Ich könnt dä ~~XXXX~~ und ~~XXXX~~ ~~XXXX~~ voll, dä ~~XXXX~~ ~~XXXX~~ Gleidarschteller
Dasch alles, woni z sage ha zum Thema Marco Schtreller

Wottsch au by uns bänggle?

Uff www.vsg-basel.ch erfahrsch meh!



Fasnacht 2019



*M*ir zwai – mir sin zwai Pfadibuebe und sin allzyt bereit
und mir vollbringe alli Daag e gueti Tat zu zwait
E Hammer und e Waageheber hüen mir jetz midfiere
No könne mir – bi de BVB-Büs – neu Pneu montiere

*D*r Johann Schneider Ammann hett – wieder Zyt fiir anderi Sache
Und dèèrf drum jede Midaag – e Midaagschleeffli mache
Stimme duet är – jetz nur no brieflich – und; nadyyrig au weele
Will in sim Alter – d'Sympathie – zu dr Urne ganz duet feele

*S*in sie Singel und hän kai Frau – das nimmt uns grad kli mid
Hän sie gwüsst dass es im IKEA – e Leesig für das gid
Stöön sie zwüsche d'Meebel yine – am beschte grad elai
Will deert nämme – d'Fraue maischtens jede Saich mit hei

E basler Schugger sait zu Tesla – «hei das isch famos»
Mit Sproochstyyrig «faar uns in Yisatz – dirägg an Zürcherstroos»
Mach d'Fliigeldiire – uff und nimm – uns denn au no mid
No sait dä Tesla – «Ziel unbekannt – s'Wort Züri kenn i nid»

*D*o letschi bin i in d'Ferie – mit Kollege – ganz wyt wäg
Luxus Hotel, Partynächt – alles suuber – niene Drägg
S'Ässe isch – e Wucht und dr Wyy – fliesst us grosse Karaffe
I finds aifach toll dass i – bi dr schwyzer Boscht deerf schaffe

*D*r Donald lüttet em Ueli a – «Hello, listen to me»
«Kumm zu mir nach Amerika – denn bisch au du derbi»
«Was muess ich dänn deet so mache?» – duet dr Ueli in Hörer huuche
«An dr mexikanische Gränze unde – könnt in di als Muurer bruche»

Z'Viel Plastik gitts im Ozean s'isch nid z'übersee
Und wenn das e Fischli frisst – duet das däm denn wee
D'Leesig isch – doch wunderbar – mir hoffe das es nützt
D'Adela hett – all dä Plastik – in ihre Kèèrper gsprützt

*W*as lauft mit dir uns wie duesch – luege us em Fuetter
Wotsch Box in Buch oder machsch's mit dinere Muetter
Das tönt jetz nach – Uslandsläng – sehr verstörrend wirgligg krass
Das isch's gepfleggt – Baseldyytsch – z'Glaihünige in dr Klass

*W*otsch italiänisch oder thai – oder e Filet schlemme
Oder wotsch digg go ässe – denn muesch zum Stucki renne
Oder wotsch – e Sandwich mit – nur aim Salaatblatt kaue
Denn muesch halt – zum FCB – in d'Mannschaft vo de Fraue

E Sensation im Atlantik – hett e Forscher gfunde
E Waalfisch hett sich e rosa Schleife uff e Rugge bunde
Me hett sogar – e warmi Strömig – kenne Mässe, s'isch verruggt
Dä Waalfisch hed – woorschinligg zum z'Morge – dr Kübelböck verschluggt

Wottsch au by uns bänggle?
Uff www.vsg-basel.ch erfahrsch meh!



Fasnacht 2019

Das stellt zwai Schugger im sälbschtfahrende Tesla dar
denn stoppt dä Tesla plötzlich, grad vor dr Pussy Bar
jetz hett er kai Strom me maint dr Aint und fohet a lache
n e i i i, dä waiss doch efang gnau wo mir unsri Pause mache.

Am Sächsilüte gschsch d’Frau Ackermäa zem Böög ane gwaggle
als Ehregascht hett’s’en deerfe aazinde mit dr Faggel
aber do hänn e baar Zunftbrieder lutt verkindet
friehner hänn d’Häxe dr Schitterhuffe nid sälber aazindet.

Mi Maa hett mi gfroggt was mer am Sunndig koche wänn
no hani gsait, ebbis wo mer scho lang nimm gässe hänn
und wo’n’en eso aalueg, hani miesse lache
mer könnte jo wieder emol e suure Mogge mache.

Wo YB Maischter worde isch hänn si sich an Basel gwändet
und em FCB e Entschuldigungs-Schrybe gsändet
und derzue no e Guetschyyn, schwarz uff wyss
fir e Wuche Trainingslager z’Bärn im Stade de Suisse.

Drey Fraue hett’s aggtuell im Bundesroot insgesamt
au d’Martullo-Blocher spegguliert jetz uff das Amt
aber d’Fraue-Quote wurd denn allem aa
bi däre nit stygge, die gältet jo als Maa.

Bis zletscht fahrt dr Dreyer no bis Millhuuse
bis zletscht fahrt dr Achter bis zem Hornbach uuse
bis zletscht fahrt dr 14er bis Lieschtel, s’wär glatt
denn mien d’Rambasse nimm mit em Traktor in d’Stadt.

Dytschland isch Fuessball-Wältmaischter, dasch dr Bescht
aber y main nid jetz, dasch scho länger här und Schnee vo gescht
wenn y dä Värs aber in vier Joor wieder sing
isch’s denn no vyyl länger här, wo die Wältmaischter worde sinn.

Y ha Bekannti, die ässe Käfer, Wirm, Kakerlake und Maade
no hani die kirzlig zum Ässe bi mir Dehaim yglaade
dä Spruch wo me immer heert hani drum nit vergässe
bi mir do kennet ihr abem Bode ässe.

Scho 90 Joor alt isch d’Mickey Maus vom Disney Walti
au d’Somaruga fyyrt, dasch zwor noni sone Alti
si fyyrt d’Änderig vo ihrem Titel, däm Glatte
in die wyblig Form vo BUNDESRAT in BUNDESRATTE.

Die Hornkueh-Abstimmig macht mer hitt no Mieh
also ych bi eigentlich fir hornloosi Kieh
denn y fänd’s jo nit luschtig bim Ässe am Disch
wenn im Hörnli-Haschee no sone Horn dinne isch.

Wo dr Xhaka mit däm Zaiche ibers Spielfäld schryttet
hetts gheisse, dass das gar nit e Doppeladler bedyttet
er hett nur em Mannschafts-Koch e Zaiche gmacht
är welli nur zwai Mischgratzerli zem Znacht.

www.bäffzgi.ch

Wottsch au by uns bänggle?
Uff www.vsg-basel.ch erfahrsch meh!





LUUSZÄPFE 2019

D'BVB het z'wenig Personal, das isch esoo.

Denn wäge däm Diräggder laufe villi dört dervoo.

Bald jede wird dört grangg und d'Stimmig goot nur no bachabb.

Es fehlt nümme vill denn haue d'Büs und d'Drämmli au no ab.

Ich scan mi Yykauf und dr Migroswichtel macht: «Miips, Miips!»

Das goot mir langsam uff e Gaischt, das ständige Gepips.

Ich gib em Scanner ains uff's Dach: «Rueh jetzt, isch das klar?»

Kasse futsch / jetzt git's e Brief: «Liebe Mobiliar....»

Ych bi im Zug – muess dringend brunze / doch s'WC isch «defekt».

Denn will ich zum näggschte laufe / wo hänn si das versteggt?

Ich suech und suech und suech und suech / das macht kai Spass

das z'hinderschthinde funggtioniert / doch jetzt sinn d'Hoose nass.

D'Frau Steinle het in Grosse Root / jä, das isch nit normaal,

ihr Buscheli mit yynegnoo / und fliegt drum uss em Saal.

Wär hätt das dänggt? Das git's doch nit! Do verschloots aim d'Sprooch!

Dass s'Buschi uuse muess / isch glaar: Dr Gschyyderi git nooch.

Zum Digitalisiere bruuchts e PC / sunscht goot nüt.

Dä kennt als Sprooch nur / Null und Ains / so rede nit vyyl Lüt.

Dass das nit funggtioniere ka / merggt d'UBS am Gwinn,

dr Grund isch glaar will oobe'n uuse – alles Nulle sinn.

Dr Pabscht im Vatikan dä het / im Färnsee uusegloo

Was är denn zu de Schwuule maint / und das döönt esoo:

«schwul syy isch e Mode» / will är's nit anderscht kennt,

do duure sinn die Brieder z'Rom / immer voll im Trend.

Im Spiegelhof bi Grabygge / het me ganz dief unde

D'Knoche vom ene Kamel uss Römerzytte gfunde.

D'Bedüttig vo däm Fund isch glaar / die kaasch däm Vårs entnäa:

Bi de Basler Schugger het's / Kamel scho immer gää.

Mi Schwiigermamme kunnt uff Bsuech / im Flugl vo Hawaii.

Si landet morn in Basel / öbbe so am halber zwai.

Drum faar ich denn zum Flughaafe / s'isch mir e Vergniege

Und loss vor ihrer Landig schnäll / my neu Droohne fliege.

7 neu Tesla / wo d'Basler Schugger griege:

Ain schnappt sich dr Baschi Dürr / är maint die könne fliege.

6 Tesla faare mit null Abgas und null Drägg,

Ai Schugger holt sys Znüni – Upps! - scho isch sy Kaare wägg.

5 Tesla faare uss dr Garage no dis noo

Ain hängt no am Laadekabel – dä het d'Wand mitgnoo

4 Tesla aine stüürt dr Schugger Fabio

Är isch duur e Schrangge g'rast / jetzt faart är Cabrio.

3 Tesla wärde in dr Wöschstrooss suuber putzt

Ain het d'Düüre d'oobegloo / jetzt sinn em d'Flügel gstutzt.

2 Tesla hänn kai Pfuus me / mache gar kai Wank

Dr ainti Schugger suecht no hüt / s'Deggeli vom Tank.

Ai Tesla isch no doo / verlasse und elai


Mir hänn en uff e Helge gnoo / und nämme'n en mit hai.

Wottsch au by uns bänggle?

Uff www.vsg-basel.ch erfahrsch meh!



Fasnacht 2019



Nachtschwärmer

S'Lied 079, wo me öfters gheert
Het d'JUSO Chefin schuurig gsteert
Si findets schyynts sexistisch, doch mir wisse, was si bloggt
Logisch het bis jetz no kaine, nach iirer Nummere gfroggt

Mir wisse, ass im Groosse-Root
Albe doch no ebbis goot
Stimmig wägeme schloofende Goof, e Fall, wo jeede kennt
Es kunnt dert sicher nid druff aa, öb aine meh oder weniger pennt

Yes and no, oh shit, maybe
Ihr wänd sicher alli wüsse, was verzellt denn däa
Mit Änglisch kunnt me besser duure, es goot hüt fascht nüm ooni
Drum gänd mir gärn dä Änglisch-Kurs, für dr Burgener und Ceccaroni

Als Drämmli Faarer, s'isch nid verkeht
Bisch bi de Fraue heiss begehrt
Meischtens sind si zimlig nätt, und gänd sich au no Mieh
Und s'Beschte an de Drämmli Faarer, si kömme garantiert nid z'frieht

D'Chineese händ, woolverstande
E Sonde hinter em Mond lo lande
D'Chineese meine, si sige die Erschte, Grössewaan wie gwohnt
Mir Schwizer sind do schnäller gsi, mir händ d'Zircher hinter em Mond

D'Baasler Schugger wänd immer s'Neuschte
Me waiss jo, sii sind nid die Schläuschte
Fir huffe Gäld händ's Teslas kauft, statt Sprit kunnt Stroom dört drii
No händ si nooni uusefunde, öb dä Stroom muess bleyfrey sii

Drotz NEI stöönd mir ganz klaar drzue
Hörner verschöönere jeedi Kueh
S'Ärschiinigsbild wird vyyt schööner, d'Wirggig isch massiv
Mit Höörner wär vilicht sogar d'Martullo-Blocher attraktiv

In Ziiri, s'isch e Sensation
Git's doch no e Fuessballstadion
Ziiri passt sich Baasel aa, wo e super Stadion het
Baasel passt sich Ziiri aa, schuttet schlächt wie dr FCZ

Fir d'Merkel wird's jetz langsam knapp
Es goot nim lang, denn tritt si ab
Ainersits, ass si goot, do verdient si unser Loob
Anderersits, was nooche kunnt, isch sicher wieder e Schwoob

Dr FCB het jubiliert
D'Männer händ ooni Fraue gfiirt
Die händ miesse Löösl verkaufe, so öbbis darf nid passiere
Hätte mir öbbis z'saage gha, mir hätte si lo serviere

Wottsch au by uns bänggle?
Uff www.vsg-basel.ch erfahrsch meh!

